

Insaaf Kā Din

Injeel : Mattā 25:31-46

[Īsā^(a.s) ne insaaf ke din ke baare me bataayā. Unhone kahā,] “Ādmī Kā Beṭā pure nur aur taaqat ke saath lautegā. Wo farishton ke saath waapas āegā aur apne takht par baithegā.”⁽³¹⁾

Duniyā kī saarī qaumon ke log uske saamne haazir honge jinko wo do jamaaton me baarht degā. Wo unheñ aise alag karegā jaise charwaahā apnī bhedon ko bakriyon se alag kartā hai.⁽³²⁾ Wo bhedon ko apne daahine haath kī taraf khaḍā karegā aur bakriyon ko baaen haath kī taraf.⁽³³⁾

“Tab baadshaah apne seedhe haath kī taraf khaḍe logon se bolegā, ‘Āo, tum log wahī ho jinko parwardigaar ne barkat atā karī hai. Āo, aur us saltanat ko qubul karo jo usne duniyā banaate waqt qaayam karī thī.⁽³⁴⁾ Tum logon ne mujhe us waqt khaanā khilaayā ki jab main bhukhā thā. Jab main pyaasā thā to tumne mujhe paanī pilaayā. Jab main ek ajnabī thā, to tumne mujhe apne ghar par bulaayā.⁽³⁵⁾ Jab main binā kapdon ke thā, to tumne mujhe kapde die. Jab main beemaar thā to tum logon ne merī dekhbhaal karī aur jab main qaid me thā to tum mujhse milne āe.’⁽³⁶⁾

“Us waqt imaan waale log sawaal karenge, ‘Kab hamne āpko bhukhā dekhā aur khaanā khilaayā? Kab hamne āpko pyaasā dekhā aur paanī pilaayā?’⁽³⁷⁾ Kab hamne āpko ajnabī dekhā aur āpko apne ghar par bulaayā? Kab hamne āpko binā kapdon ke dekhā aur kapde die?’⁽³⁸⁾ Kab hamne āpko beemaar yā qaidkhaane me dekhā aur āpkī dekhbhaal karī?’⁽³⁹⁾

“Tab baadshaah jawaab degā, ‘Main tumko sach bataatā huñ. Tumne jo bhī mere logon ke saath kiyā, chahe wo haisiyat me sabse chotā hī kyuñ n thā, to wo sab tumne mere liye kiyā.’⁽⁴⁰⁾

“Tab wo apne ulte haath kī taraf khaḍe logon se kahegā, ‘Mere paas se chale jao, tum logon par laanat hai. Tum log kabhī n bujhne waalī āg me jao, jisko Allaah taa’alā ne Shaitaan aur uske bandoñ ke liye taiyaar karī hai.’⁽⁴¹⁾ Kyuñki jab main bhukhā thā, to tumne mujhe khaane ke liye kuch bhī naheen diyā. Jab main pyaasā thā, tumne mujhe peene ke liye kuch naheen diyā.⁽⁴²⁾ Jab main ajnabī thā, tumne mujhe ghar par naheen bulaayā. Jab mere paas kapde naheen the to tumne mujhe kapde naheen die. Jab main beemaar aur jel me thā to tumne merī dekhbhaal naheen karī.’⁽⁴³⁾

“Tab log pucheñge, ‘Maalik, hamne kab āpko bhukhā yā pyaasā dekhā? Hamne kab āpko ek ajnabī dekhā, yā binā kapdon ke yā beemaar yā qaidkhaane me dekhā? Ham ne ye sab kab dekhā aur āpkī madad naheen karī?’⁽⁴⁴⁾

“Tab wo jawaab denge, ‘Main tumko ek sach bataatā huñ. Har wo kaam jo tumne mere logon ke saath naheen kiyā, chahe wo sabse neeche tabqe kā hī kyuñ n ho, to wo tumne mere liye bhī naheen kiyā.’⁽⁴⁵⁾

“Tab gunaahgaar logon ko hameshā ke liye sazā dī jaegi aur nek logon ko kabhī nā khatm hone waalī zindagi milegi.”⁽⁴⁶⁾